

KAKANJ CEMENT

HEIDELBERGCEMENT Group

Info silos

Godina VI, broj 20-21 / decembar-prosinac 2008.





Poštovani uposlenici Tvornice,

Zadovoljstvo mi je što vam u ime Uprave i u svoje ime mogu čestitati na ostvarenju rekordnih rezultata u proizvodnji i prodaji cementa u protekloj godini!

Ovogodišnji hvalevrijedni ostvareni rezultati predstavljaju izvrsno dostignuće, pogotovo imajući u vidu tržišne i privredne okolnosti u kojima su ti rezultati ostvareni.

Čestitku upućujem i kolegama iz naše kćerke kompanije „TBG BH“ d.o.o. za proizvodnju gotovog betona, koji su u ovoj godini također ostvarili rekordne rezultate u svom poslovanju.

Očekivanja su da će naredna godina biti puna izazova i neizvjesnosti, na što nedvojbeno upućuju ekonomski pokazatelji i privredna

kretanja, kao i aktualna situacija puna poteškoća u širem i bližem okruženju u kojem djelujemo. Naše je trajno opredjeljenje i obaveza da i dalje zajedničkim snagama djelujemo i maksimalno se potrudimo da i ubuduće budemo odgovorni u izvršavanju postavljenih zadaća koji su osnovni preduvjet rada, razvoja i uspjeha.

Uprava Društva kontinuirano preduzima potrebne korake i mjere za efikasno upravljanje i poslovanje, kako bi se ostvarile uštede u svim segmentima poslovanja, kako bi zadržali konkurentnost, unaprijedili poslovne procese uvjete rada te postigli rezultate.

Tokom protekle sedmice, uspješno je proveden i kontrolni audit ISO sistema za upravljanje

kvalitetom, 14001 okolišnog sistema, kao i sistema upravljanja zaštitom zdravlja i bezbjednosti na radu OH-SAS, čime pokazujemo predanost da našu tvornicu činimo sigurnom za rad u bezbjednom radnom okruženju, a svoj rad temeljimo na principima održivog razvoja. Neka nam ovogodišnji rezultati proizvodnje i prodaje našeg „sivog zlata“ budu inspiracija za buduće poslovne izazove koji nas očekuju i neka nam daju dodatnu energiju i poticaj za nove uspjehe.

Želim vam sve najbolje, puno sreće na profesionalnom i ličnom planu, sretnu i uspješnu Novu 2009 godinu.

Branimir Muidža
Generalni direktor

Neiskorištena toplotna energija



Zahvaljujući novim tehnologijama, neiskorištena toplota – koja se stvara tokom procesa proizvodnje cementa – može se iskoristiti za proizvodnju električne energije. To podrazumijeva ne samo uštede na troškovima nego posebne dobrobiti za okoliš zbog smanjenja upotrebe prirodnih resursa.

HeidelbergCement je po prvi put primijenio ovu tehnologiju u svojim tvornicama u Kini (Jingyang, Fufeng i Zhujiang). Upotrebom neiskorištene toplote iz hladnjaka klinkera i izlaznih plinova peći kao i pretvaranjem vode u paru, može se proizvesti i do 9 megawata električne energije. To je jednako jednoj trećini ukupne potrošnje energije jedne cementare.

U tvornici Zhujiang na ovaj način se proizvodi energija od novembra 2007. godine bez ikakvih problema. Instalirani kapacitet je 7,5 MW. Generator proizvodi oko 30 kWh/toni klinkera.

Tvornica cementa Kakanj opremila informatički kabinet Osnovne škole „15. april“

Skromna po opremljenosti, ali ne i po znanju koje se ovdje stiče, Osnovna škola „15. april“ je od 3. decembra 2008. godine bogatija je za informatički kabinet u kojem će učenici moći da praktično uče i usavršavaju rad na računarima, a koji im je obezbjedila Tvornica cementa Kakanj. Donaciju od deset računara sa pratećom mrežnom opremom zvanično je uručio izvršni direktor Tvornice cementa Kakanj, Izudin Neimarlija,

„Kao društveno odgovorna kompanija, Tvornica cementa Kakanj je maksimalno posvećena poticaju razvoja društvene zajednice. Svake godine Tvornica cementa Kakanj u prosjeku izdvaja više od 200.000 KM za različite vidove pomoći i podrške općini Kakanj i mjesnim zajednicama u okruženju na polju obrazovanja, zdravstva, kulture i sporta,“ kazao je Neimarlija.

Direktor Neimarlija je istakao da svake godine Tvornica cementa Kakanj raspolaže određenim brojem računara koje može donirati.

„S obzirom da smo ove godine imali veći broj računara, odlučili smo donaciju usmjeriti samo na jednu školu,

te tako omogućiti opremanje jednog informatičkog kabineta, i na taj način doprinijeti kvalitetnom širenju informatičke pismenosti u lokalnoj zajednici. Ove godine smo se odlučili za školu „15. april“ jer je ta škola najbliža Tvornici cementa Kakanj.“ Ovakve donacije su trajno opredjeljenje TC Kakanj, a ovaj model donacije informatičke opreme kakanjskoj školi smatraju najkorisnijim i namjeravaju, ukoliko to prilike budu dozvoljavale, svake godine jednoj od kakanjskih osnovnih škola opremiti kabinet za informatiku.

„Donacija je došla u pravi čas, jer već odavno oskudijevamo u informatičkoj opremi. Svima znamo da je obrazovanje preduslov za privredni razvoj, te će tako i ova donacija pomoći našoj djeci da na vrijeme ‘uhvate korak’ sa svjetskim trendovima u oblasti obrazovanja. Samim tim će i kvalitet ukupnog nastavnog procesa u našoj školi biti na višoj razini“, kazala je Amina Jašarspahić, nastavnica u OŠ „15. april“ za predmet Informatika. *„Želim se od srca zahvaliti Tvornici cementa Kakanj na ovom jako lijepom činu.“*



Nakon prošlogodišnjeg remonta koji je urađen u rekordno kratkom roku od 30 dana, ovogodišnjim remontom postavljen novi rekord od 22 dana

„Zimski“ remont u julu

U vrijeme sve jače konkurencije i sve većih zahtijeva tržišta, u fokus poslovanja i proizvodnje stavljen je kupac i njegove potrebe. Iz tih razloga u Tvornici cementa Kakanj posebna se pažnja posvetila raspoloživosti proizvoda svim kupcima, pa su u tom smjeru rađeni i planovi za ovu godinu. Ono što je veoma značajno za ovu godinu je rekordno kratak rok u kojem je izveden remont, čime je ostvarena veća raspoloživost proizvodnih postrojenja a samim tim i veća količina proizvoda.

„Neobično je što je ove godine remont izveden u julu, tačnije od 1.-23. jula, dok smo ranije uvi-

jek radili generalne zamjene na postrojenjima tokom zime,“ kazao nam je Izudin Neimarlija, izvršni direktor za proizvodnju i tehnička pitanja. „Zbog veoma dobrog stanja vatrostalne opeke, produžili smo sa proizvodnjom sve do jula. Stabilnost proizvodnog procesa uzrokovana dobrom kvalitetom ulaznih komponenti i visokom kvalitetom održavanja opreme faktori su koji su značajno doprinijeli da se opeka održi sve do jula ove godine.“

Pored standardnih zahvata i zamjene opeke, ono što je značajno za ovogodišnji remont je i zamjena zubnog vijenca na mlinu sirovine koji je svoj zadatak vjerno obavljao 20 godina.



Najveća zasluga i ove godine naravno ide svim radnicima koji su direktno i indirektno radili na remontu. *„Dobra organizacija, planiranje i posvećenost svih radnika zajedničkom cilju – povećanju obima proizvodnje - presudni su faktor najkraćeg remonta u historiji naše tvornice,“* ističe generalni direktor Branimir Muidža. *„Posebno se zahvaljujem svim radnicima koji su predano radili na ostvarenju ovog rekorda, što nas ove godine stavlja u sami vrh tvornica HeidelbergCement grupacije sa najvišim pokazateljima iskorištenja i raspoloživosti postrojenja.“*



Ambasador Njemačke posjetio Tvornicu cementa Kakanj



U četvrtak, 27.11.2008. godine direktor Tvornice cementa Kakanj, Branimir Muidža, primio je novoimenovanog ambasadora SR Njemačke u BiH njegovu ekscelenciju Joachima Schmidta. Ovo je bio nastupni susret gospodina Schmidta kao novog ambasadora. Glavna tema razgovora bilo je višegodišnje ulaganje njemačke kompanije HeidelbergCement u Bosni i Hercegovini.

„Ulaganje HeidelbergCementa u Bosni i Hercegovini počelo je 2000. godine privatizacijom Tvornice cementa Kakanj, i to je prvi uspješni projekat velike privatizacije u Bosni i Hercegovini. U proteklih osam godina uložili smo preko 120 miliona KM u rekonstrukciju i unapređenje postrojenja kakanjske cementare, kao i u pogone za proizvodnju betona,“ kazao je Muidža. „Tvornica cementa Kakanj danas je moderna i ekološki prihvatljiva tvornica koja radi u skladu sa zakonima i normama

Evropske unije, i u koju je ugrađena najbolja dostupna tehnologija.“

Tokom obilaska postrojenja za proizvodnju i pakovanje cementa, gospodin Muidža je ambasadoru Schmidtu

predstavio tekuće i planirane projekte investiranja, među kojima se posebno ističu modernizacija mlinova cementa, izgradnja novih silosa klinkera i projekat uvođenja starih guma kao pogonskog goriva, za koji Tvornica cementa Kakanj još uvijek čeka odobrenje nadležnog ministarstva. Posebno je naglašeno da se alternativna goriva kao ekološko rješenje u Njemačkoj u cementnoj industriji koriste već skoro tri decenije.

Ambasador Schmidt se zahvalio na prijemu i pruženoj prilici da se direktno upozna sa eventualnim poteškoćama i mogućnostima njihovog savladavanja, kao i mogućnostima dodatnih ulaganju u BiH. Gospodin Schmidt je istakao kako će posebnu pažnju posvetiti unapređenju investicionih ulaganja iz SR Njemačke u BiH, i poželio menadžmentu Tvornice cementa Kakanj još više uspjeha u budućnosti.



Tvornica cementa Kakanj proslavila svoj dan



Dana 15. decembra 2008. godine Tvornica cementa Kakanj slavi 30 godina uspješnog rada i postojanja. Tim povodom 12. decembra u prostorijama Tvornice cementa Kakanj oraginzovano je druženje sa radnicima, penzionerima i porodicama preminulih radnika i penzionera.

Direktor TC Kakanj, Branimir Muidža, nije krio zadovoljstvo rezultatima koje je ova tvornica ostvarila u proteklih nekoliko godina: „*Iza nas je još jedna rekordna godina, što je rezultat predanog truda i zalaganja svakog pojedinca naše kompanije. Do ovog trenutka proizveli smo i pro-*



dali više od 750.000 tona cementa, i tako premašili ovogodišnji plan za više od 16 procenata. Ništa od ovoga ne bi bilo moguće da nije bilo vašeg rada i doprinosa. Neka nam i naredne godine donesu mnogo uspjeha i zadovoljstva.“

Za sve zaposlenike, penzionere i porodice poginulih i preminulih radnika obezbijedene su nagrade i prigodni pokloni, i organizovan svečani ručak. Pored toga ove godine 12 radnika slavilo je 25 godina rada u Tvornici cementa Kakanj, te su im uručene zahvalnice i tradicionalni poklon, ručni sat.



Posebno priznanje za Tvornicu cementa Kakanj

U ponedjeljak 20.10.2008. godine, u Sarajevu je održana svečanost povodom 10 godina rada TUV Sava Ljubljana (sada TUV SUD BiH) na prostoru Bosne i Hercegovine. Na ovoj svečanosti su dodjeljena posebna priznanja firmama u BiH koje su se među prvima certificirale, kao i firmama koje su među prvima izgradile integrirani sistem upravljanja.

U tom smislu Tvornica cementa Kakanj je dobila posebno priznanje kao firma koja je prva u BiH izgradila i implementirala OHSAS 18001:1999 i time postala prva firma u BiH koja je izgradila i implementirala integrirani sistem upravljanja kvalitetom, okolinom, te zaštitom zdravlja i sigurnosti na radu u skladu sa zahtjevima standarda ISO 9001:2000, ISO 14001:2004 i OHSAS 18001:1999.



Dani otvorenih vrata 2008.



Tvornica cementa Kakanj posluje prema konceptu održivog razvoja, kojim je jasno definisana uključenost u podršku lokalnoj zajednici kao jednom od bitnih područja društvene odgovornosti. Jedan od načina uključivanja je i Dan otvorenih vrata, koji je prvi put organizovan u Tvornici cementa Kakanj 2002. godine.

Uposlenici TC Kakanj su i ove godine pripremili bogat zabavni program za građane Kaknja. Manifestacija je počela u petak 29.08. koncertom grupe Zabranjeno pušenje. Grupa Zabranjeno pušenje i Tvornica cementa Kakanj ove godine obilježavaju 30 godina uspješnog rada, pa su ovaj značajni jubilej proslavili zajedno sa nekoliko hiljada Kakanjaca.

„Ova godina po mnogo čemu je značajnija od prethodnih jer proslavljamo trideseti rođendan. Cementara u Kaknju izrasla je u jednu modernu kompaniju koja je prepoznatljiva u širem regionu, kako po kvaliteti proizvoda tako i po naporima i sredstvima koja ulaže u zaštitu okoliša i lokalnu zajednicu,“ kazao je Izudin Neimarlija, izvršni direktor TC Kakanj.

U subotu 30.08. održan je tradicionalni turnir u malom nogometu, kao i street basket takmičenje gdje su mladi košarkaši imali priliku družiti se sa košarkašima tima Bosna.

U popodnevrim satima uživali su



najmlađi za koje je Tvornica cementa Kakanj obezbijedila predstavu Aladin u izvedbi Pozorišta mladih Sarajeva. Djeca su sa uživanjem, glasnim komentarima i smijehom pratili interesatnu priču o dobro poznatom Aladinu koji se ovaj put suočava sa izazovima modernog življenja. Nakon predstave kakanjskim mališanima podijeljeni su pokloni i baloni. Najmlađi su također učestvovali u trci u vrećama i bili u prilici osvojiti vrijedne nagrade.

Penzionerima su ove godine podijeljeni slatki paketi, a oni malo mlađi mogli su uživati u simpatičnim trikovima klovna ili se zabaviti playstation i nintendo wii igricama.



Predstavници kompanije Schwenk posjetili Tvornicu cementa Kakanj

Enjoy Business



U julu 2008. godine članovi Uprave Tvornice cementa Kakanj imali su čast ugostiti delegaciju kompanije Schwenk, jednog od dioničara HeidelbergCement grupacije. Tokom ove jednodnevne posjete članovi višeg menadžmenta kompanije Schwenk, od kojih je većina po prvi put posjetila BiH, obišli su postrojenja Tvornice cementa Kakanj, posjetili kamenolom Ribnica-Subotinje, te obišli historijsko jezgro glavnog grada Bosne i Hercegovine. Izrazili su veliko zadovoljstvo gostoprimstvom i viđenim u Tvornici cementa i BiH. Tokom obilaska postrojenja gospodi

iz Schwenka su prezentirani su planirani projekti investiranja, među kojima se posebno ističu modernizacija mlinova cementa, izgradnja novih silosa klinkera i projekat uvođenja starih guma kao pogonskog goriva, čemu je data posebna podrška. Naime, u Schwenku već decenijama koriste alternativna goriva kao pogonsko gorivo, u šta su se mogli uvjeriti i vijećnici Općine Kakanj i predstavnici naše Uprave prilikom prošlogodišnje posjete jednoj od Schwenkovih tvornica u Karlstadu.

Na inicijativu FIPA-e, u produkciji autorskog tima "Refresh Production", pripremljeni su spotovi "Enjoy Business Bosnia and Herzegovina" koji prezentiraju potencijale koje pruža poslovni ambijent u Bosni i Hercegovini.

Riječ je o projektu čiji cilj je promovisanje privrednih potencijala Bosne i Hercegovine u svijetu koji će doprinijeti daljnjem poboljšanju imidža naše zemlje u čijoj realizaciji su učestvovali uspješne kompanije iz Bosne i Hercegovine, a među njima i naša tvornica.



Baustoffe fürs Leben



Deutsches Business Forum održan u krugu Tvornice cementa Kakanj

Potpisivanje Ugovora o stabilizaciji i pridruživanju Evropskoj uniji i njegovim uticajima na poslovanje

U četvrtak, 10.07.2007. godine Tvornici cementa Kakanj pripala je čast da ugosti poslovni forum „Deutsches Business Forum” koji je organizovalo Udruženje za unapređenje njemačko-bosanskohercegovačkih privrednih odnosa, čiji je član i Tvornica cementa Kakanj. Učesnici foruma su predstavnici kompanija članica ovog udruženja, a tema ovog poslovnog foruma bila je potpisivanje Ugovora o stabilizaciji i pridruživanju Evropskoj uniji i njegovim uticajima na poslovanje.

Gost govornik foruma bio je Matthias Heinz, prvi sekretar privrednog odjela njemačke ambasade u Bosni

i Hercegovini. On je ovom prilikom istakao da Bosna i Hercegovina mora što prije uskladiti svoje zakonodavstvo sa zakonodavstvom EU. *„Nakon ratificiranja sporazuma od strane članica EU, zemlja će se moći smatrati članicom i tek nakon ovog koraka preduzeća mogu očekivati određena poboljšanja u svojim oblastima. Cilj je da u narednih pet godina budu ispunjeni svi uslovi koji su definisani ugovorom, a što se tiče Njemačke, već sada se može reći da je Bosna i Hercegovina atraktivna, jer se u narednom periodu može očekivati povećan uvoz roba iz vaše zemlje,”* kazao je Matthias Heinz.

Pored predstavnika firmi članica Udruženja, poslovnom forumu prisutvovali su i ministar u Vladi ZDK-a Fahrudin Omerhodžić, te direktor Rudnika Kakanj Misad Jašarspahić, kao i direktor TE Kakanj Salih Purišević. *“Veliko nam je zadovoljstvo ugostiti ovakav skup koji okuplja privrednike iz cijele Bosne i Hercegovine te predstavnike svih razina vlasti u BiH, kao i ambasada, što je svakako vrijedno i za Tvornicu cementa Kakanj i za grad Kakanj,”* kazao je generalni direktor TCK, Branimir Muidža.



Projekat zatvorenog sistema snabdijevanja tehnološkom vodom



Započet je projekat izgradnje zatvorenog cirkulacionog sistema tehnološke vode u iznosu od više od preko 1 milion KM, koji će biti završen u prvoj polovini 2009 godine, što je naš najznačajniji projekat do sada u cilju zaštite i poboljšanje kvaliteta voda.

Primarni cilj projekta je smanjiti utrošak vode neophodne za hlađenje postrojenja, odnosno smanjiti količinu zahvata vode iz rijeke Bosne čime se eliminišu negativni efekti vodostaja rijeke Bosne (mulj koji se taloži na stijenkama postrojenja). Zatvoreni sistem snabdijevanja tehnološkom vodom podrazumijeva cirkulaciju iste vode u kružnom toku u postrojenjima, a zahvat vode se obavlja samo da bi se nadoknadili gubici uzrokovani isparavanjem.

Projektnu dokumentaciju uradila firma Mašinoprojekt iz Zagreba prošle godine. Ista firma radila projekat postojećeg otvorenog sistema snabdijevanja tehnološkom vodom.

U julu su pokrenuti građevinski radovi koji uključuju izgradnju nove pumpne stanice, bazena hladne vode, uređenje lokacija i ploča za separatore ulja i kompletan povratni vod tehnološke vode to nove pumpne stanice. Postojeći separatori će se uvezati u ovaj novi sistem i dodati još jedan separator za lokacije peći i pakovaone. Veći dio građevinskih radova već je završen.

Implementacija ovog projekta odvija se planiranom dinamikom i konačno stavljanje u pogon ovog sistema planiran je u junu 2009. godine, nakon što se završi montaža, kontrola i ispitavnje opreme, provede probni rad, obavi interni tehnički pregled i napravi tehnički prijem.



Generalni direktor TCK izabran u Upravni odbor Vijeća stranih investitora

Na redovnoj generalnoj skupštini FIC-a (Foreign Investment Council – Vijeće stranih investitora) održanoj 11. decembra 2008. godine, generalni direktor Tvornice cementa Kakanj, Branimir Muidža, izabran je za člana Upravnog odbora ove organizacije. FIC je neprofitno poslovno udruženje koje predstavlja strane privrednike u Bosni i Hercegovini. Ciljevi ovog udruženja su poboljšanje investicijskog i poslovnog okruženja u BiH, i promocija komunikacije i saradnje FIC-a i vlasti BiH.



Impresum

Info silos - interno glasilo
Tvornice cementa Kakanj
Broj: 20/21-2008.

Izdavač:
Tvornica cementa Kakanj d.d.
Kakanj
Selima ef. Merdanovića 146
72240 Kakanj
Tel: 032 557 500
Fax: 032 557 600

Za izdavača:
Branimir Muidža, generalni direktor
branimir.muidža@heidelbergcement.com

Uredništvo:
Emina Dedić
emina.dedic@heidelbergcement.com
Mahira Softić
mahira.softic@heidelbergcement.com

DTP: Grafittim d.o.o. Zenica

Štampa: Grafittim d.o.o. Zenica

Foto: Emina Dedić, Tvornica cementa
Kakanj, HeidelbergCement Group

Broj strana: 12

Tiraž:
400 primjeraka